

Broj: 05-34-2270/17

Mostar, 12.03.2018.g.

Na osnovu člana 56. i 66. Zakona o organizaciji organa uprave u Federaciji Bosne i Hercegovine ("Službene novine Federacije BiH", broj 35/05), člana 7., 8., 9. i 14. Zakona o energijskoj efikasnosti u Federaciji Bosne i Hercegovine ("Službene novine Federacije BiH", broj 22/17) a u vezi sa tačkom 5. Zaključka o donošenju Akcionog plana energijske efikasnosti Federacije Bosne i Hercegovine – EEAPF ("Službene novine Federacije BiH", broj 53/17), Federalni ministar energije, rudarstva i industrije d o n o s i

ODLUKU o uspostavljanju Kantonalne platforme u Federaciji Bosne i Hercegovine

1. Kantonalna platforma u Federaciji Bosne i Hercegovine (u daljem tekstu: Kantonalna platforma FBiH) se uspostavlja s ciljem:
 - pružanja tehničke pomoći svim kantonima FBiH u ispunjavanju obaveza u domenu energijske efikasnosti koje proizilaze iz Zakona o energijskoj efikasnosti u Federaciji Bosne i Hercegovine (u daljem tekstu: Zakon),
 - unapređenja vertikalne i horizontalne komunikacije između federalnih ministarstava, Fonda za okoliš i kantonalnih Vlada.
2. Kantonalnom platformom koordinira Federalno ministarstvo energije, rudarstva i industrije (u daljem tekstu: FMERI), a tehnička pomoć se osigurava kroz tehničku asistenciju Njemačkog društva za međunarodnu saradnju – GIZ.
3. Rad Kantonalne platforme se odvija u okviru dvije radne grupe:
 - Radna grupa za pružanje tehničke pomoći kantonima u izradi Kantonalnih planova energijske efikasnosti,
 - Radna grupa za pružanje tehničke pomoći u izradi izmjena i dopuna postojećeg zakonodavnog okvira iz domena prostornog planiranja i korištenja zemljišta i građenja na svim novoima vlasti i u odnosu na odredbe Zakona.
4. Vlade svih kantona u Federaciji BiH su obavezne da, s ciljem realizacije aktivnosti iz tačke 1. ove odluke, imenuju članove radnih grupa i imenovanja dostave u FMERI.
5. Tehnička pomoć iz tačke 2. ove odluke podrazumijeva prezentacije, mentorstvo, rad u grupama, individualni rad, savjetovanje, a omogućava da članovi kantonalnih timova, kao stvarni nosioci izrade Kantonalnih akcionih planova energijske efikasnosti (u daljem tekstu: KEEAP), izrade KEEAP na način da:
 - razumiju principe strateškog i operativnog planiranja, energijske efikasnosti i obnovljivih izvora energije, finansijskog planiranja, menadžmenta i sl.,
 - usvoje praktične vještina o definisanju, izboru i rangiranju mjera energijske efikasnosti,
 - ovladaju načinima praćenja i verifikacije ušteda od EE na nivou kantona,
 - izrade organizacione i strukturne sheme upravljanja potrošnjom energije i sl.

6. FMERI, kao resorno ministarstvo za provođenje politike poboljšanja energijske efikasnosti, donosi Plan pružanja tehničke podrške kantonima s ciljem izrade što efikasnijih trogodišnjih KEEAP-a, usaglašenih sa EEAPF-om, sa periodom realizacije mart- kraj maja 2018.g.
7. Plan pružanja tehničke pomoći iz tačke 6. ove odluke obuhvata:
 - predstavljanje metodologije i formata za izradu kantonalnih planova energijske efikasnosti.
 - izrada pregleda trenutnog stanja u potrošnji finalne energije po sektorima na području kantona i upoznavanje sa indikativnim ciljevima
 - definisanje mjera za poboljšanje energijske efikasnosti u okviru kantonalnih planova energijske efikasnosti.
 - finaliziranje mjera i izrada operativnog plana aktivnosti za unapređenje energijske efikasnosti javnih institucija na nivou kantona
 - izrada operativnog, finansijskog i terminskog plana za provođenje kantonalnih programa energijske efikasnosti
 - izrada operativnog kantonalnog plana za praćenje ušteda finalne energije kroz aktivnosti tržišta i drugih aktera uz definisanje organizacione sheme upravljanja procesima energijske efikasnosti na kantonu.
 - Finaliziranje prijedloga kantonalnih planova energijske efikasnosti.
8. Za provođenje aktivnosti iz tačke 7. ove odluke je zadužen GIZ u okviru tehničke asistencije i uz koordinaciju FMERI.
9. Trogodišnji KEEAP , kantonalna tijela će pripremati u saradnji sa tijelima lokalne samouprave, ekonomskim udruženjima i udruženjima za zaštitu okoliša, kao i drugim zainteresiranim licima, te pružaju stručnu pomoć jedinicama lokalne samouprave pri izradi njihovih Programa poboljšanja energijske efikasnosti. Sastavni dio KEEAP-a su planovi za unapređenje energijske efikasnosti javnih institucija uspostavljenih na nivou kantona.
10. KEEAP-e, prije njihovog usvajanja, Vlade kantona su dužne dostaviti u FMERI s ciljem procjene njihove usaglašenosti s EEAPF-om.
11. FMERI, kao resorno ministarstvo za provođenje politike poboljšanja energijske efikasnosti, donosi Plan pružanja tehničke podrške pri izradi izmjena i dopuna postojećeg zakonodavnog okvira iz domena prostornog planiranja i korištenja zemljišta i građenja na svim novoima vlasti i u odnosu na odredbe Zakona.
12. Plan pružanja tehničke pomoći iz tačke 11. ove odluke obuhvata:
 - Predstavljanje procesa i definisanje pristupa izradi izmjena i dopuna Zakona o prostornom planiranju i korištenju zemljišta na nivou Federacije Bosne i Hercegovine i kantonalnih zakona o prostornom uređenju i građenju prema odredbama Zakona o energijskoj efikasnosti FBiH;
 - Kreiranje nacrtu prijedloga za izmjene i dopune zakonskog okvira za građenje za svih jedanaest (11) nadležnih ministarstava u Federaciji Bosne i Hercegovine u dijelu koji se odnosi na usklađivanje istih sa Zakonom o energijskoj efikasnosti u F BiH.

- Predstavljanje finalnih usaglašenih prijedloga izmjena i dopuna važećeg zakonskog okvira za građenje, i dostavljanje konačne verzije individualnih dokumenata svakom od jedanaest (11) nadležnih ministarstava u Federaciji Bosne i Hercegovine.
13. Za provođenje aktivnosti iz tačke 12. ove odluke je zadužen GIZ u okviru tehničke asistencije i uz koordinaciju FMERI.
14. Ova odluka stupa na snagu danom donošenja i objaviće se na web stranici FMERI.

MINISTAR

Nermin Džindić

